



Groupe parlementaire

N° 7537
Entrée le 31.01.2023
Chambre des Députés
Déclarée recevable
Président de la Chambre des Députés
(s.) Fernand Etgen
Luxembourg, le 01.02.2023

Här Fernand Etgen
Präsident vun der Deputéiertechamber
19, um Krautmaart
L-1728 Lëtzebuerg

Lëtzebuerg den 31. Januar 2023

Här President,

Esou wéi d'Chambersreglement et virgesäit, bieden ech lech, dës parlamentaresch Fro un d'Madamm Ëmweltminister weiderzeleeden.

De 15. Dezember war an der Presse ze liesen, datt d'Vullegripp nees zu Lëtzebuerg ënnerwee ass, dëst net zulescht wéinst de Wanderungsbewegungen, déi d'Vullen am Hierscht an am Wanter ënnerhuelen. Sou wéi et mir zougedroe gouf, spillen notamment invasiv Aarten, wéi zum Beispill Nilgänsen eng wichteg Roll bei der Verbreedung vun deem Virus.

An der Äntwert op déi parlamentaresch Fro Nummer 4384 vun der ADR vum 28. Mee 2021 huet déi deemoleg Madamm Ëmweltminister op d'Fro, wéi eenzel Bierger, awer och Lëtzebuerg sech als Land zukünfteg géint invasiv Aarte schütze kënnen, dat hei geschriwwen: *"Fir punktuell Problemer ze léisen, kënnen déi betraffe Bierger eng Autorisatioun beim Ministère fir Ëmwelt, Klima a nohalteg Entwécklung ufroen"*.

An deem Zesammenhang géif ech der Madamm Ëmweltminister gär dës Froe stellen:

- 1) Kann d'Madamm Minister confirméieren, datt notamment invasiv Vullenaarten, wéi d'Nilgänsen fir den Ausbroch vun der Vullegripp verantwortlech sinn?
- 2) Kann d'Madamm Minister elaboréieren, wéi eng legal Méiglechkeeten de Bierger mat an ouni Juegdschäin zur Verfügung stinn, fir sech op hirem eegenen Terrain géint invasiv Aarten ze wieren?
- 3) Kann d'Madamm Minister matdeelen, wéi een Zerwiss vun der Naturverwaltung fir de Schutz vun der eenheemescher Flora a Fauna géint invasiv Aarten zoustänneg ass, iwwert wéi eng Kompetenzen si verfügen a wéi eng Mëttelen hinnen dobäi fir hir Missioun zur Verfügung stinn?

Mat déiwem Respekt,



Fred Keup
Deputéierten



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

Äntwert vun der Ministesch fir Ëmwelt, Klima an nohalteg Entwécklung op d'parlamentaresch Fro n°7537 vum 31. Januar 2023 vum éierewäerten Deputéierten Här Fred Keup iwwert "Espèces envahissantes"

Kann d'Madamm Minister confirméieren, datt notament invasiv Vullenaarten, wéi d'Nilgänsen fir den Ausbroch vun der Vullegripp verantwortlech sinn?

De Virus vun der aviärer Influenza betrëfft Hausgefligel a verschidde Wëllvullenaarten. D'Ursaache fir d'Ausbréch sinn, ewéi ëmmer an der Natur, villfälteg: intensiv Gefligelfarmen, Beweegung vu Wëllvullen, asw. Et kann also net alleng op invasiv Vullenaarten zeréckgefëiert ginn an soumat och net op Nilgäns

De Contraire ass de Fall: d'Ausbréch vun der Vullegripp sinn an der Reegel mat Hausgefligelzuucht zesummenhängend, wéi och mat der Vermaarkung vun deene Produkter an aneren Vektoren. Vun do aus spréngt de Befall dann op Wëllvullen iwwer.

Ech erlabe mir, op d'Recommandatioune vum Bericht vun der *Scientific Task Force on Avian Influenza and Wildbirds* vun der *Convention on the Conservation of Migratory Species of Wild Animals* (CMS) vum Januar 2022 ze verweisen:

https://www.cms.int/sites/default/files/uploads/avian_influenza_0.pdf

Hei gëtt däitlech dorop higewisen, datt et keen Avantage bréngt de Virus an der Wëllvullepopulatioun duerch Keulung oder Habitatzerstéierung wëllen ze kontrolléieren an datt souguer ze vill Aktivitéit vum Mënsch an den Habitater zu enger Verbreedung ka féieren. Zudeem muss een och besonnesch oppassen datt een net duerch Persounen oder Gefierer de Virus a sensibel Zonen mat protegéierten Arten erabrénge.

Et sief och nach erënnert, datt migréierend Wëllvullen net gläich invasiv Vullenaarte sinn. Bis dato (fir d'Joer 2023) ass just een nogewisene Fall bei de Wëllvullen, engem engem Sëlwerreeër bekannt. Dës Vullenaart ass eng integral protegéiert Déierenart.

Kann d'Madamm Minister elaboréieren, wéi eng legal Méiglechkeeten de Bierger mat an ouni Juegdschäin zur Verfügung stinn, fir sech op hirem eegenen Terrain géint invasiv Aarten ze wieren?

Bei der Problematik vun der Gestiou vum invasiven exoteschen Aarten schwätzen mir vun Déieren an Pflanzen.

D'Handlungsméiglechkeeten bei den Déieren hänke staark vum jeeweilige Problem a vun der Aart of. Wann et sech ëm Präventiounsmoosnamen handelt, ass oft keng Geneemegung erfuerderlech, well de Problem duerch d'Verhënnerung vum Accès zum Haus, Gaart, Kompost oder Drecksback geléist ka ginn. Wann et ëm d'Afänken an d'Doutmaache vun Déiere geet, muss eng Geneemegung am Kader vum Naturschutzgesetz ugefrot ginn. D'Handlungsméiglechkeete ginn da gegebenenfalls an der jeeweileger Geneemegung beschriwwen.

An de verschiddenen Aktiounspläng zu invasiven exoteschen Aarten (Planzen an Déieren) sinn déi aarteszefesch Mesuren virgesinn. Dës gi gréisstendeels vu Fachleit an de Verwaltungen, an de biologesche Statiounen oder an de Naturparken ausgefouert.

De Lien mam Juegdschäin ass net opportun. Et dierf een net einfach sou op sengem Terrain ee Juegdakt ausüben, et sief dann, et huet een d'Juegdrecht gepacht op deem Juegdous zu deem déi respektiv Parzellen gehéieren. Dee Moment misst et sech dann och mol ëm eng bejobar Parzell handeln. Ee bebauten Terrain beispillsweis gehéiert net zu engem Juegdous, deemno kann dorop



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

net gejoet ginn. Och gehéiert net all invasiv Aart zu de bejobaren Aarten wéi se an der Annexe vum Juegdgesetz festgehal sinn.

Ech wëll hei och nach eemol drop hiweisen, datt d'Fiddere vu Wëllinten a Wëllgänsen a ganz besonnesch vun exoteschen invasiven Aarte soll ënnerlooss ginn.

Kann d'Madamm Minister matdeelen, wéi een Zerwiss vun der Naturverwaltungfir de Schutz vun der eenheemescher Flora a Fauna géint invasiv Aarten zoustänneg ass, iwwert wéi eng Kompetenzen si verfügen a wéi eng Mëttelen hinnen dobäi fir hir Missioun zur Verfügung stinn?

D'Naturverwaltung ass a regional an zentral Servicer ënnerdeelt, déi sech jee weils mat operativen a konzeptuellen Aufgabe beschäftegen. Dohier si souwuel d'Arrondissementer an Triagen, ewéi och de Naturservice an de Bëschservice mam Sujet befaasst. Et ass allerdéngs ze beuechten, dass opgrond vun der Natur vum Sujet a ville Fäll de Naturservice d'Aufgaben iwwerhëlt.

De Naturservice erfëllt seng Aufgaben am Kader vum Naturschutzgesetz, dem EU-Reglement n°1143/2014 an der *Loi du juillet 2018 concernant certaines modalités d'application et les sanctions du règlement (UE) n° 1143/2014 du Parlement européen et du Conseil du 22 octobre 2014 relatif à la prévention et à la gestion de l'introduction et de la propagation des espèces exotiques envahissantes.*

An deem Service schaffen 2 Agenten an 6 Aarbechter déi sech, nieft aneren Aufgaben, ëm déi konkret Gestiou vum etlechen invasiven exoteschen Aarte këmmere.

Lëtzebuerg, den 6. Mäerz 2023

(s.) Joëlle Welfring

Ministesch fir Ëmwelt, Klima an nohalteg Entwécklung